



40096

I


Mag. St. Dr.

P

*Febl. 3134.*

*Lehenci Andr. Inacritia de Angelis*







QVÆSTIO  
DE ANGELIS

Ab  
ANDREA SCHONEO,  
THEOLOGIÆ ET IVRIS VTRIVSQUE

Doctore, publicè in alma Academia Cra-  
coviensi, die 2. Septembris, hora 12. ad  
disputandum proposita.

*Pro loco inter Doctores S. Theologie  
assequenda.*



CRACOVIAE,  
In Officina Andreae Petricouij, Anno Domini,  
M. DC. II.

Ku. III. 74. y. 8.



In Insignia  
BERNARDI MACIEIOWSKI  
EPISCOPI CRACOVIENSIS

Andreas Schoneus.

**G**ratum animal VITVLVS. dominū pascitq̃ hilaratq̃.  
Et CHRISTI typus & victima sancta fuit.  
Tu quoq̃ fers cunctis MACIEOVI gaudia, alisq̃.  
Munificis manibus cœnobis atq̃ inopes.  
Plaudit nunc pietas, exultant templa scholæq̃.  
Hæresis una gemit, se latebrisq̃ tegit.

40096

Tr



ILLVSTRISSIMO  
AC REVERENDISSIMO  
DOMINO D. BERNARDO MACIE-  
IOWSKI, EPISCOPO CRACOVIENSI,  
Duci Seueriensi, atq; Academiae Cracouiensis  
Cancellario amplissimo, Mœcenati ac  
patrono singulari.

ANDREAS SCHONEVS.

**L**EX est Uniuersitatis nostræ, Illustrissi-  
me Antistes, ut qui in exteris Academiis,  
Doctorem Sacræ Theologiæ lauream  
acceperunt, non prius hîc apud nos in Do-  
ctorum numerum atq; ordinem adsciscantur, quàm  
Petrum Lombardum, communiter Magistrum Senten-  
tiarum appellatum, qui vniuersam Theologiam, primus  
ferè via & ratione tradidit, publicè prælegerint, ac dein-  
ceps eo explicato sollemnem disputationem habuerint.  
Quod sapienter à maioribus nostris institutum est, neq;  
propterea, quòd aliquid de aliorum Gymnasiorum laude  
atq; dignitate deminutum vellent, quorum & iudicia  
semper plurimi fecerunt, & laudi atq; gloria fauerunt,  
sed ut hac ratione optimi quiq; & diu multumq; specta-  
ti, in amplissimum eum ordinem adlegerentur, ipsiq; pro-  
palam explicatis ingenij & doctrinæ suæ opibus, maiorem  
sibi apud omnes opinionem atq; auctoritatem compara-



rent. Quare, cum & mihi in Italia, omnium erudit-  
rum artium atq; disciplinarum nobilissimo emporio atq;  
officina, Doctoratus insignia sumere contigerit, Univer-  
sitas nostra nullo pacto me ea lege soluere & eximere vo-  
luit, sed prius Magistrum Sententiarum explicare, &  
nunc ecce hanc Quaestionem de Angelis ad disputandum  
proponere me oportuit. Atq; fateor equidem longè subli-  
miores & obscuriores esse in Sacra doctrina quaestiones,  
quæ erudita ingenia exercere possunt, sed ut hanc de  
Angelis proponerem, illud me potissimum impulit, quod,  
cum omnibus etiam Philosophis, & qui in Theologica di-  
sciplina non adeò exercitati sunt, disputandi concedatur  
facultas, maiorem differendi materiam habituri sint,  
& ne planè quasi in alieno foro versentur. Quanquam  
& hæc materia suos nodos & laqueos habet, & in illa  
viri ingenio & doctrina abundantes sudauerunt, neq;  
omnes hoc salum placidū & trāquillum, ut quibusdam  
videtur, sine periculo & saluis mercibus transmiserunt.  
Tibi verò amplissime vir, hunc qualemcumq; conatum  
meum dedicare & inscribere volui. Tu enim Aca-  
demie nostræ es Cancellarius, id est dux & antistes stu-  
diorum nostrorum, custos & defensor libertatum, &  
quod tibi proprium est, præmiorum literariorū ἀποδοτής,  
id est, in cuius manu & potestate est, has Doctorales co-  
ronas viris doctrina & ingenio excellentibus conferre  
atq; distribuere. Deinde tu iam olim me in patrocinium  
tuum recepisti, meq; singulari benevolentia semper com-  
plexus es, non tam meo merito, quàm magni illius Soco-  
louj



louij causa, cuius domi hæc mea studia coaluerunt, &  
cum quo magna necessitudo & amicitia tibi fuit, quiq;  
quotidianis sermonibus tuas præstantissimas virtutes  
prædicare solebat. Ego autem disciplina Socolouiana  
institutus, ita in studium & obseruatiam tui tota mente  
atq; pectore incitatus sum, ut tibi potissimum ingenium  
meum sudare, literuleq; meæ placere gestiant, atq; omne  
meum mihi mutum esse videatur, quod tu non audis, ac  
quasi oleum & operam perdere existimem, si te non mea-  
rum contentionum testem, iudicem atque fautorem habe-  
am. Accipe igitur Mæcenæ amplissime, hanc dispu-  
tationem grato animo, & Schoneum iam olim tuum,  
ama, orna & tuere. Vale viueq; diu felix, Eccle-  
siae Dei, Reipublicæ, omnibusq; bonis. Craco-  
uia ex Collegio maiori, ipso die  
S. Bernardi.

A 3

Quæstio



# Quæstio DE ANGELIS.

Ab

ANDREA SCHONEO, THEOLO-  
gia & I. V. Doctore, in Academia Cracoviensi pu-  
blice pro loco inter Doctores Theologia assequen-  
do, ad disputandum, die 2. Septem-  
bris proposita.

V. Angeli, qui sunt substantiæ intellectu-  
ales, simplices, incorporeæ, incorruptibi-  
les, & à Deo in gratia conditæ, intelli-  
gant omnia per species naturaliter indi-  
tas, an verò per species acquisitas & à  
rebus acceptas.

## CONCLUSIO I.

Angeli sunt substantiæ intellectuales & simpli-  
ces.

### COROLLARIA.

1. Angelos esse ex fide certum est, tamen ratione na-  
turali



*turali id euidenter demonstrari nequit.*

2. *Angeli non sunt creati ante mundum corporeum, sed simul cum cælis & elementis.*
3. *Angeli sunt perfectius ad imaginem DEI creati, quàm homines, & ideo naturæ sunt præstantioris.*
4. *Angeli non sunt actus puri, sed sunt compositi metaphysicè ex genere & differentia, natura & supposito, esse & essentia, subiecto & accidentibus.*
5. *Ordo Hierarchicus Angelorum non ex visione beatifica, neq; ex cognitione naturali, sed ex cognitione supernaturali, quæ fit extra verbum, formaliter sumitur.*

## CONCLUSIO II.

Angeli sunt substantiæ incorporeæ & incorruptibiles.

### COROLLARIA.

1. *Angeli Verè assumunt corpora, ex aëre potissimum formata, sed in iis operationes vitales non exercent.*
2. *Ab Angelis immediatè formata & assumpta sunt corpora, in quibus legitur Deus apparuisse.*
3. *Angeli sunt entia necessaria & ab intrinseco immutabilia.*
4. *Angeli neq; per creationem, neque per educationem formæ de materia, possunt producere substantiam.*



5. *Angelus potest mouere omne corpus ad omnem dis-  
ferentiam loci, non tamen ordinem vniuersi pertur-  
bare.*

### CONCLUSIO III.

Angeli omnes habuerunt aliquando gratiam, &  
habuerunt illam primo instanti suæ creatio-  
nis.

#### COROLLARIA.

1. *Gratiam quam acceperunt Angeli primo momen-  
to suæ creationis, acceperunt illam per propriam disposi-  
tionem actuale.*
2. *Angeli boni, propriis meritis antecedentibus, conse-  
cuti sunt beatitudinem supernaturalem.*
3. *Angeli primo instanti suæ creationis peccare po-  
tuerunt.*
4. *Peccatum primum Luciferi, qui fuit supremus in-  
ter omnes Angelos, non fuit solum ex inaduertentia &  
incogitantia.*
5. *Angeli beati non possunt proficere in beatitudine,  
neq; peccare, sicut nec mali per pœnitentiam, à peccatis  
& pœnis eternis liberari.*

CON-



## CONCLUSIO IIII.

Angeli cognoscunt Deum & seipsos, per suam substantiam.

### COROLLARIA.

1. *Angeli non cognoscunt Deum naturaliter, clarè & quidditatiuè.*
2. *Angeli cognoscunt etiam Deum per species intelligibiles, quas habent inditas, omnium effectuum creatorum.*
3. *Angeli perfectiùs cognoscunt Deum per species superiorum Angelorum, quàm per suam substantiam.*
4. *Angeli non cognoscunt naturaliter mysteria gratiæ, quæ sunt supernaturalia per se & secundum suam substantiam.*
5. *Angeli omnes cognouerunt à principio per fidem, mysterium Incarnationis, quo ad substantiam & in communi, non autem plenè, & quo ad modum & circumstantias.*

CON-



## CONCLUSIO V.

Angeli cognoscunt alia omnia per species cum natura congenitas, non verò acquisitas.

### COROLLARIA.

1. *In Angelis non est intellectus agens.*
2. *In Angelis est alia cognitio matutina, alia vespertina.*
3. *Angeli superiores cognoscunt per species magis vniuersales & pauciores.*
4. *Angeli inter se loquuntur, non per signa aut nutus, sed per ordinationem voluntariam proprii conceptus ad alterum.*
5. *Angeli superiores illuminant inferiores de omnibus quæ sciunt, & quæ pertinent ad statum nature, gratiæ & gloriæ.*

Hæc Quæstio cum suis Conclusionibus & Corollariis disputabitur in Lectorio DD. Theologorum Academiae Cracouiensis, die 2. Septembris, hora 12.









